

KENYATAAN MEDIA

KUALA LUMPUR (10 DISEMBER 2021) - Pesuruhjaya Kanak-Kanak Suruhanjaya Hak Asasi Manusia Malaysia (SUHAKAM), Prof Dato' Noor Aziah Mohd Awal (CC) menzahirkan rasa sedih dengan kematian kanak-kanak lelaki berusia 5 tahun di Taman Nusa Bestari, Johor baru-baru yang didakwa telah didera oleh ibu kandung dan bapa tirinya.

Pasangan yang mempunyai dua anak lain iaitu seorang anak perempuan berusia 8 tahun dan seorang anak lelaki berusia 2 tahun dilaporkan mempunyai rekod lampau di bawah Seksyen 31(1)(a) Akta Kanak-Kanak 2001 kerana pengabaian kanak-kanak dan Seksyen 15(1)(a) Akta Dadah Berbahaya 1952 kerana penyalahgunaan dadah. Menjadi satu persoalan mengapa kanak-kanak berkenaan dibenarkan berada di bawah jagaan pasangan tersebut walaupun mereka telah didakwa atas kesalahan mendera anak perempuan sulung mereka dan kes itu masih belum selesai.

Menurut Seksyen 18 Akta Kanak-Kanak 2001, mana-mana pelindung, penolong pelindung, atau pegawai polis yang berpuas hati atas alasan munasabah bahawa kanak-kanak memerlukan penjagaan dan perlindungan, boleh membawa kanak-kanak itu ke dalam jagaan sementara, melainkan pelindung, penolong pelindung, atau pegawai polis berpuas hati bahawa pengambilan prosiding berhubung dengan kanak-kanak itu adalah tidak diingini demi kepentingan terbaik kanak-kanak itu; atau prosiding akan diambil oleh orang lain. Perkara 20(1) CRC juga menyatakan bahawa seseorang kanak-kanak yang dilucutkan secara sementara atau kekal dari persekitaran keluarganya, atau untuk kepentingan terbaiknya sendiri tidak boleh dibenarkan tinggal dalam persekitaran itu, berhak mendapat perlindungan dan bantuan khas yang disediakan oleh kerajaan. Oleh itu, CC berpandangan bahawa kanak-kanak itu sepatutnya telah dikeluarkan dan ditempatkan dalam persekitaran yang lebih selamat oleh mana-mana pelindung, penolong pelindung atau pegawai polis sebelum mereka menjadi mangsa atau mempunyai risiko menjadi mangsa pasangan itu.

Penderaan dan keganasan terhadap kanak-kanak adalah isu yang membimbangkan di seluruh dunia, termasuk di Malaysia. Berdasarkan laporan Berita Harian Online bertarikh 8 Julai 2021, statistik JKM melaporkan bahawa terdapat 2040 kes penderaan kanak-kanak berlaku antara Januari hingga April 2021. JKM turut membentangkan statistiknya kepada OCC pada 8 April 2021 yang menunjukkan bahawa ibu kandung merupakan individu paling tinggi yang bertanggungjawab terhadap penderaan kanak-kanak dan ia meningkat kepada 9.8% (148 kes) pada tahun 2020 berbanding 2019. Sehubungan itu, CC menyeru JKM untuk serius menangani perkara ini dan mengambil pendekatan dan langkah yang sewajarnya untuk membendung isu tersebut bagi memastikan semua kanak-kanak dilindungi daripada sebarang bentuk keganasan. Kementerian Pembangunan Wanita, Keluarga dan Masyarakat (KPWKM) melalui Bahagian Kanak-Kanak di JKM juga digesa untuk campur tangan dan menyiasat sama ada pelindung JKM telah cuai dalam penyeliaan dan menjalankan kuasanya, kerana KPWKM bertanggungjawab untuk menyediakan penjagaan, perlindungan, dan pemulihan kanak-kanak bagi menjamin kesejahteraan mereka.

-TAMAT-

Professor Dato' Noor Aziah Hj. Mohd Awal, Pesuruhjaya Kanak-Kanak
10 Disember 2021

Pertanyaan Media: Sila hubungi Pn. Norashikin Hamzah melalui 03-2612 5687 / 019-621 5336 atau shikin@suhakam.org.my

“Hak Asasi Untuk Semua”

Untuk sebarang pertanyaan sila hubungi Suruhanjaya di 03-2612 5600